

給二人之料使之校正俾無誤字不然則復 祖宗之舊規亦

可也答曰如啓

己卯 上御朝講典經金鎮曰臣聞以各官寺社田推刷之事
內官下歸濫竽下人托稱寺田冒占侵虐平民傾家產而輸給
自去年大風雨兩麥皆已枯死民不聊生又有此弊極為寒心
傳于政院曰內官之作弊者先罷後推○以任弼亨為慶州府
尹金貴榮金弘度為弘文館修撰○日量兩珥抱冠戴色內黃
外青夜哭方良方如火氣

庚辰 上御朝講領經筵事尚震曰凡用兵當審國勢今兵食
俱乏災異不絕所當恐懼修省之日固非興師動衆之時前日
野人問罪之事朝廷共議臣不能止也書曰慮善以動動惟厥
時我先失道而敢興憤兵彼人先知少壯皆走而徒殺老弱無
以示威而益招後來之患矣尹春年曰前年伊應巨島之事識
者當初皆以為不可自 上不勝議者之言而設之未幾骨幹
作亂今宰相謀議以為當興問罪之師野人雖頑豈不知曲直